

Umiarsuarmik ilaasartaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalakkersuisut peqqunneqarnissaannik Inatsisartut aalajangiiffigisassaattut siunnersuut

(Inatsisartuni ilaasortaq Aqqalu C. Jerimiassen, Atassut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Umiarsuup ilaasartaatip ataatsimik ilaneqarnissaa, taamaalillunilu Nanortallip Upernaviullu tikinneqarsinnaalernissaat pillugu aalajangiiffigisassatut siunnersuummut qujavunga.

Sinersorluni angallassineq nunatsinni attaveqaqatigiinnermut tamarmiusunut ilaavoq, borgmesterit kiisalu Inatsisartuni Naalakkersuisunilu ilaasortat marsimi attaveqaqatigiinneq pillugit isumasioqatigiissineqarmata sinersorluni angallassineq politikkikkut tapersorsorluarneqartoq malunnarpoq.

Ukiut qulikkaat ingerlanerini umiarsuit sinersorlutik ilaasunik angallassisartut amerlassutsimikkut nikerarsimapput, aammalu atuisuusugut tamatta umiarsuit assigiinngitsut nuannersorpassuarnik eqqaamasaqarfigaavut.

Umiarsuaq ataasiinnaq maanna angalammatt, umiarsualiviit tikinneqarsinnaasut amerlassutsimikkut killeqarput. Tamanna Naalakkersuisut ingerlaavartumik umiarsualivinnut arlalinnut sinersortaatinik tikisitsisalernissaannik amerlasuut kissaateqarnerannut naapertuutinngilaq.

Maanna umiarsuaq sinersorluni ilaasunik angallassisartuq 1992-imili angalavoq. Ukiumut 20.000-it missaannik angallassisarnermi umiarsuup pisinnaasai tamakkerlugit atorneqaqqajangillat. Taamaallaat aasaanerani umiarsuaq ulikkaartarpoq. Taamaattumik aamma Sarfaq Ittuk kiffartuussinermit isumaqatigiissut aqqutigalugu ingerlanneqarpoq. Kiffartuunneqarnermut isumaqatigiissut atuuttoq maanna 2020-p naanerani atorunnaartussaavoq, soorlu ilaasunik angallassinermi kiffartuunneqarnermut isumaqatigiissutit arlallit aamma 2020-p naanerani atorunnaartussaasut.

Umiarsuarlut ilaasartaatinut, issittumi angalasanut piumasaaqatit qaffasinneri erseqqissassallugu pingaaruteqarpoq. Taamaattumik umiarsuarmik nutaamik, 1. januaari 2020 aallarnerfigalugu angalalersinnaasumik nassaarniarnissamut piffissaq sivikippallaarpoq. Tamatuma saniatigut taamatut aningaasaliinissamut aningaasanut inatsimmi tunngavissaqartoqannngilaq.

Naalakkersuisut kiffartuussinermit isumaqatigiissuteqarfiusussamut tullermut neqerooruteqartitsinissamut sulianik aallartitsipput. Tassani allannguutit annertuut, mittarfiit

nutaat atorneqalernerini pinngitsoorani pisussat, taamaalillunilu angalariaatsini allannguinnissat eqqarsaatigalugit sulisoqassaaq.

Naalackersuisut 2006-imi angallasseriaatsimi marlunnik aallaaveqartumit ataasiinnarmik aallaaveqalernissaq aalajagiummassuk, tamanna ilutigalugu ilinniartitaanermut suliassaqarfik tunngavissinniarlugu kiffartuunneqarnissamut isumaqatigiissutit tunngavigalugit aningaasat nuunneqarput. Angallasseriaatsimi tamakkiisumik allanngortitsinerit aningaasartuuteqarnerulernermik malitseqarput, taamaattumillu allannguutit annertuut peqqissaarullugit pilersaarusioneqartariaqarput. Siunissami sinersorluni angalasarnissamut eqqarsaatit siunissami kiffartuunneqarnissamut isumaqatigiissutissatut suliamut ilaatinneqassapput. Tassunga ilanngullugu ilaasut ingerlaartarnerinut, kiffartuussinerup qaffasissusissaanut tunngavissanut, akulikissusissamut tikikkuminassutsimullu tunngasut ilaatinneqassapput. Tunngavissat taakku siunissami kiffartuussinermut isumaqatigiissutinut aningaasaqarnikkut sinaakktissanik tulleriarinermut tunngaviliisussat Inatsisartunit aalajagerneqassapput.

Januaarip aallaqqaataa 2020 aallarnerfigalugu umiarsuup ilaasortaatip allamik ilaneqarnissaanut aalajangiinissamut tunngavissanik suliaqartoqarsinnaanissaa Naalackersuisunit piviusorsiortutut isumaqarfigineqanngilaq, taamaattumillu siunnersuut itigartinneqassasoq inassutigineqarpoq.